

*Agama. Solat. Taubat.  
Ta'at*





- 4 Burung gagak hinggap di dahan,  
Ular lidi di ranting temin;  
Syariat ditegak syiar dipertahan,  
Patut menjadi slogan Muslimin.
- 5 Cucur badak dimakan satu,  
Selesai satu makan roti;  
Maut tidak mengenal waktu,  
Maka itu ingatlah mati.
- 6 Pergi pekan ke kedai nyonya,  
Kerana hendak membeli baulu;  
Tawakal bukan pada tempatnya,  
Jika tidak usaha didahulu.
- 7 Bergurau senda petang hari,  
Duduk bersama berlama-lama;  
Kalau anda mencari isteri,  
Pegangan agama diberi utama.
- 8 Encik Fuat menjadi johan,  
Sukanya dia sujud ke bumi;  
Janji taat kepada Tuhan,  
Dimungkiri ia Allah hukumi.
- 9 Buah duku petik di lurah,  
Duku disantap bersama pala;  
Baik laku sebesar zarah,  
Allah tetap janjikan pahala.
- 10 Cik Salina membuat rendang,  
Sama ladna menjamu rakan;  
Selawat perdana di tengah padang,  
Hadis mana jadi rujukan?

- 11 Dinding diukir suntuk sehari,  
Pintu hendak diukir sama;  
Amalan zikir menari-nari,  
Dituntut tidak oleh agama.
- 12 Bubuh lokan dalam raga,  
Ulam raja atas peti;  
Agama bukan barangan niaga,  
Boleh dijaja sesuka hati.
- 13 Kak Fifah naik kereta,  
Ke Batu Kikir berjumpa lamai;  
Di Padang Arafah doa dipinta,  
Bukan berzikir beramai-ramai.
- 14 Encik Khair orang Jasin,  
Memberi tuhfat orang desa;  
Menjual air dibacakan Yasin,  
Amal khurafat melambai dosa.
- 15 Terima ijazah sebagai pendeta,  
Ditunjuk jalan untuk berbakti;  
Menziarahi jenazah berkasta-kasta,  
Bukan amalan Muslim sejati.
- 16 Sembilang karang beliak mata,  
Sama pari punggah di jeti;  
Salah orang nampak di mata,  
Salah sendiri simpan di hati.
- 17 Cik Ima santunnya gadis,  
Tutur kata penuh amanah;  
Mengaji agama Quran dan hadis,  
Baru dikata mengikut sunah.